

四庫全書

集部

欽定四庫全書

楊忠介集卷七

明 楊爵 撰

祭文

祭原方畦先生文

先生蚤棄軒冕樂道力田視不義之富貴如浮雲之漠然惟欲窮討古今之典籍以擴充其未盡之天踐履方正胸次高遠其超乎塵外也如鳳凰之高逝必千仞而

翔其確乎不拔也如松栢之挺翠貫四運以獨芳慨君
子之存歿為人世之否臧何皇天之愍遺俾遠邇其感
傷某忝為知友聞訃奔走心懷永悼匪言可盡敬陳薄
奠先生享之

祭次女文

嘉靖二十二年三月初一日父在獄中以書告石氏女
子秋之墓曰嗚呼痛哉女子秋汝有知乎其聽父三千
里外哭汝之言去年三月某日汝偲兄到京以書告我

言汝疾病秋九月汝休兄復告汝病日深吾見其詞語
悽愴若有隱不盡告之意今年二月內仕自家鄉來吾
以書問汝存歿且言當以實告休等始言壬寅歲夏四
月十五日丑時分汝以疾終於汝家是時偲仕皆在京
師休與汝母共送輜車葬汝於盤月村之南嗚呼子秋
汝果死矣不知是何等病乃即死也吾數汝死期在吾
下獄一年零二月之後將無以吾得罪之深惶懼不寧
即成病以死乎果若此吾心不能不汝咎也吾觀古今

以來為人臣者豈無狂愚妄論時政身陷罪戾如我今日者乎為其女子者或有天性仁孝篤於愛親而不解於心者豈皆憂戚成病淹焉莫救以殞其生乎嗚呼痛哉子秋汝何至於斯也汝何至於斯也吾尚記汝童稚時吾教之使讀孝經論論及女訓諸篇汝又數向予索讀烈女傳吾見性資聰敏多能曉悟但過於剛烈不能含容忍耐以成中和之德此等氣象與汝父絕相類也汝父罪難悠悠自分宜死死而蒙恩歸葬故里吾欲汝

姊妹兄弟懸棺而定封以馬鬣樹以荆梓共成一哭從此朝夕朔望再勿流涕宜意汝即蚤死使我於囚繫顛危中反哭汝痛汝弗能已耶嗚呼子秋犴門深鎖今已三年汝父一念白日青天忽聞汝死雙淚漣漣西望茫茫未得洒汝墓前念之窮極一至斯焉乃十九年庚子歲秋予始北行汝與汝姊送我中庭視我漸遠顧瞻徘徊容顏戚慘兩淚盈腮汝父不德天毒降災乃汝姊妹淪胥以推二三年間黃土兩堆我心匪石胡不痛哀今

我寫此傷悼之情命汝休兄以家釀一盞麥飯一盂歸
告汝靈父若得荷主上再生之恩歸來有期念汝長逝
心抱無涯之悲即於汝姊汝墓次第哭之嗚呼子秋汝
來顧此

誌銘

兄安之翁墓碣

嗚呼痛哉此吾兄安之之墓也吾兄諱靖字安之我先
君豐山處士長子也處士君配吾母李夫人生我兄弟

二人吾兄生于成化丙午十一月二十二日卒于嘉靖
壬辰三月十一日享年僅四十有七嗚呼天其何奪之
速耶意者爵之不德昊天降災故使至于此極耶不然
彼令兄弟駢駢怡怡相與而耄期于一門者世多有之
我何玃玃子子形隻影單而無以為倚耶嗚呼痛哉吾
兄生而聰敏早歲欲以儒術自鳴不果遂舉為縣掾非
其志也後罷歸力田養母暇惟讀書無他好也歲嘉靖
戊子爵領鄉薦將赴試禮闈行有期吾兄戒之曰弟必

舉進士可出仕慎勿汲汲也越明年爵舉進士授行人
司行人嘉靖十年奉使河南便道歸省時吾兄已嬰疾
矣聞爵至喜甚自謂疾若脫體身衣袍布以帛裹帽起
俟于門內爵拜見尚能答拜吾母哭之曰吾兒汝兄今
日復得見汝矣於是母子兄弟相與流涕者久之爵見
吾兄疾未瘥吾母在堂年已七十即欲事畢後告歸既
抵京吾兄以書止之曰我病全可慎勿憂慮又曰弟當
盡忠報國亦不必歸來時壬辰年三月十五日也爵獲

書方以母兄平康為慶不知吾兄之卒已五日矣嗚呼
痛哉吾兄平日好讀史臨歿遺言以通鑑斂棺中病之
革也自正衣冠辭母與叔母皆四拜自為書屬爵以後
事甚詳又戒子姪且勿以凶訃告爵云恐吾弟不堪傷
痛故諸子遵其命至是年秋爵始得聞訃是時爵已陞
試監察御史吾兄不及聞矣嗚呼痛哉如吾兄者其處
人已親疎之間亦可謂善矣奈何其不壽也嗚呼痛哉
昔我先君之捐世也我兄弟同哭之及吾兄卒踰年尚

未葬吾母亦以天年棄養爵哭母又哭兄天其何使我
遭此凶之極耶嗚呼痛哉吾兄配王氏生于弘治丁巳
八月十八日卒于嘉靖癸巳正月十一日得年三十有
九是年四月十三日合葬於先塋之次龍又有側室劉
氏有子二人長曰休王氏所生學儒次曰佶劉氏所生
今尚幼不知二子者有能立身揚名為吾兄之光否乎

臨終自書墓誌銘旌

今存壙中

吾平生所期欲做天下第一等人而行不逮欲幹天下

第一等事而績未成今臨終書此以誌墓願吾子孫當
吾身後擇吾善者從之其不善者改之此其意也在人
世五十七年亦不可謂不壽但懿行不足垂萬世功業
未能裨當時是謂與草木同腐朽

墓誌

五十餘年生長人世未盡聖賢之道兩受天祿還形地
下難忘君父之恩

銘旌

京來壙誌銘

京來御史楊某伯修之第三子也生八歲死某誌其壙

曰京來形貌清奇心性慧朗兩目炯炯年五六歲能詠
古詩數十篇吾視之如麟角鳳毛以為他日大吾之門
者必此子也抑孰知其至于斯乎故其死也吾哭之痛
痛不已哭之以詩曰仰視旻天秋夜深西風推却老來
心世間唯有子喪父何我哭兒淚滿襟嗚呼傷哉先嘉
靖十五年冬京來患瘡疹既瘥咳嗽未已予謂疹後餘
毒尋常自止及至次年夏益甚百藥不效至八月十九
日黎明時竟不救以死是其賦于天者修短有數一定

而不可易歟其諸人事感召之未善也奈之何吾不感
于心乎是年九月六日以下殤禮葬于先塋之前龍鳴
呼死矣不可復生也托銘石上涕泣而納諸土周之所
銘曰吾兒有生何不穀汝父汝母哭汝兮痛徹心骨有
樹有封是兒之先羽機送汝兒其歸焉

雜著

讀易

余既久在罪難中自念君子存仁造次顛沛未嘗少懈

歲月云邁百年易失頃刻光陰未可以若醉若夢而玩處之也即卧側障之以簾盥手焚香凝神清慮讀易于其間客有謂予者曰其名此為安樂窩可乎余應之曰不然也余之罪多矣奚以安樂為哉人之處世非安樂則困辱二者而已世之人或以富貴為安樂以患難為困辱此固未然而謂吾之處困為安樂亦非也夫其所為慊於心而合乎義理之中正則雖日在患難此心未嘗不安樂也夫其所謂愧于心而戾乎義理之中正則

雖日處富貴而此心未嘗不困辱也吾之所為質於古人之作用為何如其愧於四聖亦多矣然則名我所處為困辱富可也又奚以安樂為哉況易之為書廣大悉備天地萬物之理具於此損益困節中孚習坎則切于處憂患之道也因銘以自警銘曰安樂安樂由心之作展轉困辱惟吾所速四聖垂訓炳炳簡編議之而後動擬之而後言或可以觀玩象辭而補吾之愆

清明

清明節人以柳絮一枝贈予予即謝之以詩有知君憐
我國中久故送乾坤生意來之句既而觀之不覺心曠
神怡動靜坦夷鬱抑百結之愁腸忽變而為廓然無涯
之胸次矣於是喟然嘆曰天地生生不已之理仁者渾
然同物之心即此可以默識而旁通之矣吾意此時當
風景清和百彙亨通芳隄曲岸之間賢人君子攜酒賦
詩相與更唱迭和而賞此柳者或有之賢人君子蓋賞
物之得其所也物之得所由人之得所也人物得所豈

易言哉予乃持以歌之歌曰春遲遲今日融融飽雨露
兮舞東風感物類兮動吾中動吾中兮憂叩叩

七月七日

世傳七月七日天孫出嫁人間女子乘時乞巧唐人柳
子厚亦有乞巧文嗚呼女子所乞者刺繡中饋之能耳
丈夫之巧欲何為哉予今日獄中所乞則異於是他人
乞巧予惟求拙他人乞榮顯予惟以罪自安於困辱焉
予素所畜者欲退則躬耕畝畝以全微軀進則勞心以

利天下此平生之志至拙之術也庚子歲以愚拙應徵
任職五月食君之祿未敢苟安但知為宗廟社稷萬萬
年深長之慮而不知為子孫身家一日計此非拙之尤
甚者乎當是時予之拙見謂天下之事吾當拙為之不
可為當以拙退之不能退當以拙死之以拙求死不可
得而今當以拙坐監故展轉凶危苟延殘息於五年而
不自悔皆拙之驗也願天孫鑒臨下土照我衷曲即我
素所欲而未能自盡者以增益之使我抱此迂拙終身

不易生為拙人死為拙鬼無使我忘身殉國之拙或變而為苟生利家之巧焉乙巳年七月初七日爵焚香再拜祝

宋忠簡公像贊

建炎之初皇綱解紐二宗北轅一帝南走寤寐思賢宜不敢後而於公忠猷棄如糞土事至於此天實為之於人何尤嗟夫使公回鑾北征之疏得一舉行則仗義揚威經營四方根本之慮付之李綱將相協力國勢以昌

燕雲以北我圉我疆神京可復鐘簴不改而徽欽父子
可生反於大梁惜其為羣小阻抑懷恨而歿使中原流
血宇內分割鬼哭神憤莫可救藥相緣相習而多自戕
伐保養奸諛賊殺忠良奔播危促退而渡江遂至奕世
統緒閩海一舫焚香就溺以告滅亡而為志士仁人所
痛傷然則公一身之存歿豈特為宋人國步之隆替而
實萬世名義綱常之所係也

劉秀才字說

泰和劉秀才名年字以時予為之說曰年統四時春夏
秋冬不失其序天之道也性具四德仁義禮智出當其
可人之道也以人道合天道惟其時而已性焉安焉者
謂之聖復焉執焉者謂之賢士希賢賢希聖則純乎天
矣吾敢以志此人道而亶亶不怠者有望於年焉

香灰解

予復下獄半載為丙午年三月初七日晨旦東廠使邏
者來覘即予卧側以殘輒藉囚板上相與偶坐者久之

獄中穢氣鬱蒸久在內者習不自知從外乍進則臭不可堪乃以棒香一莖插坐前甑縫中焚之須臾香盡灰不散宛如一完香焉予取而懸諸壁上至第五日猶未散因思其故為作解以散之夫是物也其將中抱憾積憤凝滯於此而有不釋然耶抑焚猶未焚而托此以為永久耶二者雖有間焉而其精誠感致則一也遭世乖變人定勝天即一物之微而其用之所措固有幸不幸焉耳蓋賓筵廣設幄錦幃羅庖翟薦德恪舉殊儀

叶五和切音哦

上庸環冕下列笙歌君臣交慶委佩鳴珂旅語之際嘉
謀孔多聞善即聽若決江河王猷下降枯槁滂沱雍容
揖遜永息干戈上安下順宇內沖和則唐虞三代之境
界也燒異薰以昭明德固已有之舍彼其處而來焚吾
獄中焉此何等氣象也瑾櫬掩戶日影不通塵留負鼠
隙引汚風一息淹淹百慮忡忡其與吾環列而偕坐者
不過三五囚徒東西南北偶此相逢或十三四齡口尚
乳臭之豎子或八九十歲鬚眉皓然之老翁身披帶索

首冒飛蓬額蹙氣喪肌削腸空縱蓄百金一動即窮荷
校滅耳罪彼不聰手梏足械膿白血紅俯就坎窞仰叫
穹窿使聞之者皺眉見之者戚恫甚至於不能為心則
閉目掩耳佯為聾聵爾來焚此可謂擇地擇人之未審
忽於所入而謬于所從者矣久而不化疑有神明類彼
志士之死不瞑嗚呼其劉忠愍耶抑周後山蒲竹塘耶
不死正寢死此福堂名垂不朽同彼霄壤與我國家為
龍為光雖然陵谷有時而變遷金石亦至於消泐故凡

全氣成質寓形宇內而為人為物者終歸於盡天地如
此其大也古今如此其遠也其孰不蕩為灰塵而揚為
飄風乎爾其欲外消息盈虛之常道觀反覆無窮之世
變以後天而終乎是固無此理也吾為爾摩散之再拜
而祝之曰匪人焚爾惟爾自焚爾不馨香與物常存煨
以烈火騰為氤氲上而不下聚而不分直衝霄漢變為
奇雲餘香不斷苾苾芬芬龍逢比干相與為羣爾宜自
慊胡為云云理無二致吾以喻人事苟可死何憚殺身

願爾速化歸彼蒼旻樂天委運還爾之真拜起悽愴雙
淚盈襟嗚呼易化者一時之形難化者萬世之心形化
而心終不化吾其何時焉與爾乎得一相尋也



楊忠介集卷七

欽定四庫全書

集部

楊忠介集卷八至十

詳校官監察御史_臣曹坦

中書_臣劉源溥覆勘

總校官編修_臣王燕緒

校對官中書_臣陳本

謄錄監生_臣應斯濤

欽定四庫全書

楊忠介集卷八

明 楊爵 撰

賦

夢遊山賦

昔和煦以轉泰兮歲惟丁夫壬寅予彷彿於夢中兮夢
歸遊於咸秦歷韓魏之故疆兮泛栢舟於渭濱浮颶颶
以遠覽兮暫憩夫山之危岑乃吳嶽之崔嵬而秀麗兮

古號曰西雍之鎮峯突兀以峻出兮勢若連乎霄辰石
巉巖以峻嶒兮百壑研其嶙峋風習習以清和兮迹迥
脫於世塵草與木森森而夭喬兮秀雲邊其萃萳鳥與
獸蹒蹒而頡頏兮若解意以相馴予乃采芝蘭以聊茹
兮氣和煦而苾芬把清泉以時酌兮蕩吾夙昔之塵襟
忽回顧以寥廓兮百峯羅翼其共臨俯仰予長嘯而朗
吟兮高胸次以樂真山有廟焉迤邐其麓之東南兮以
時妥侑乎嶽神棟宇苞罩其壯固兮丹青煥乎其惟新

背巖嶮而面涇渭兮延廣袤其幽沉古取夫萃與渙之
大義兮儼嶽像以獨尊予乃肅容儀以瞻拜兮心慄祇
其快覩復長跼而祝之曰惟明神其監觀于下土以大
義而降禎祥與妖孽兮斯固無幽而不燭夫何世事之
紛紛乃有稽典訓而不類兮固予中心其眩貿予敢筮
游衍而不予隱兮願得夫子奪之微故惟予小子之有
生兮何不辰而遭世風波洒憂時之血忱而貞志於乎
先兮固久罹於窳圯時省愆而思咎兮求不忝於屋漏

於歲月之陽春兮今已兩過念予總角而志學兮每矢
心以克邁嚴步履以出戶兮敢斯須而或怠景先招以
周旋而與歸兮忽凶害焉其顯崇固予小子反復思之
而莫知其謂也語畢悽慘流淚潛然偃僂伏俯聽神所
言惟神賑爾而有聲兮復喟然其長嘆曰嗚呼來汝小
子是爾之愆爾不聞曲其躬而圓其行兮取封侯以相
先或有貞直方而未少回兮死固不免於道邊當行而
吾行之兮當止而即止斯先達之明訓而可敬服兮胡

不珍身而量處道固不能無消息兮感斯有常而有不
苟相幾而或少戾兮夫孰與禍災而自取惟明哲之見
高一世兮動自遠於坎珂識隱機而尚肥遯兮泛長江
之一舸乃有迷檢括而允諧兮拂潛晦以自顧銜崑山
之良璧兮人共惜夫楚和履大閑而不苟措兮固自謂
世所尚也當衲鑿之不類而欲強置兮孰不指身心以
為訛嗚呼小子而今後其尚亹亹焉以克勵未可以一
蹙而遽挫思福堂之玉汝於成兮方一念之偏頗惟古

良士之堅志於患難兮日尚友以切磋寧雉介之耿於
羅網兮勿狡兔其爰爰寧松栢挺挺於歲寒兮勿桃李
其灼灼何所往而非吾可安之地兮慎無怵中而懷憂
彼皇矣之全賦於有生之初兮惟反身而是求聽吾誨
爾之諄諄兮尚不忝於前修苟迷途其終不悟兮乃脂
韋以自羞予乃再拜稽首而起應嘒嘒其未已將周旋
以出戶忽驚愕以覺悟時東方之既晨愧絲粟於枕衾
嗚呼天耶神耶教戒懷切誠可信而可遵大道坦坦而

無曲兮固不越乎吾之心

四言古詩

偶作

颺颺西風悠悠危困霧掩長空懷此憂疚我生尚有我心難忍告爾君子不可不慎天方威降無滋幽囂

颺颺西風悠悠危困我生不辰遭此難屯告爾君子胡不自盡拯溺救焚伊誰之人天方降威無為顛震

颺颺西風悠悠危困自昔以來貽我煩懣告爾君子各

宜履順誤國之謀伐國之刃天禍方殷無惜憂瘞
颺颺西風悠悠危困我心日憂我淚日投蒼天蒼天胡
降阨運謀猷乖離而日以甚抱此赤心徒爾諄諄
何以圖之周道惟近騏驎惟良莫耶非鈍聽無不聽視
無或瞬各欲事天豈敢相迫我為爾謀爾無不信

西風五章章十句

五言古風

感懷

志士輕天下不類世人情由來守之固出自見之明時
哉誠可尚古今不易真緬懷千載上愧此魯連生存趙
片言重却秦天下驚脚跟高蹈處無陂總是平

次杜少陵韻答人

殘息悠悠在真成一懦夫當年何所為心欲見唐虞世
路豈翻覆人為自險夷好生與惡死此念胸中知

宋葵

山中惜歲月日暮采園葵采之何所用欲以贈相知相

知相去遠道路多阻蹇安得藉晨風萬里寄誠懇

四丁寧贈錢員外緒山

留心剪枝葉枝葉更穠鮮努力勤于耒共耕方寸田吉
人常默默浮士好便便覺彼高騰處反將真意擇昊天
但覆幬四運自周旋孔聖無言教真機向此傳丁寧一
告語告以聖同天

結交結君子茅茹自相連媚悅增心癖孰能示我愆相
同即是聖異處且為賢以此求斯道恐成狹且偏心能

樂取善善自我心全舍已從人處襟懷何大焉丁寧再告語無我自天然

迂儒多曲語壯士自平夷千古周行在胡為向小歧荆榛不自剪令我此心迷洞識虛明體超然即在茲性分同一理此理最淵微孔聖言仁處力行不遠而丁寧三告語相與憶所之

尚友希前哲無勞辨淺深開言動喋喋矛戟已森森祇覺胸懷隘恐非畜德心古人各有見原本自相忱豈若

異流者馳騁多詖淫何苦但永矢宜從得處尋丁寧四
告語其嚴此心箴

贈人

先生藏遠趨微原欲探討仁風秀羣英禮化淑懷抱講
堂逍遙處相與篤皇道芥宮滋松華泮池潤瑤艸瑤草
日日長松華歲歲好君子尚采采衿佩以為寶

哭姜義泉郎中

公諱
時和

前日哭尚書今日哭郎中大夫相繼死應時命之窮但

擬同出險豈堪忽告終將吾一掬淚頻洒與西風

二

吾痛翟司馬又哭姜義泉人生值變故與世自相關義
泉死今日司馬肉未寒義泉瘞今日司馬殯未乾桎梏
非自取幾微隱禍端悠悠天地裏展轉屬艱難

中秋懷友

寂寞今宵景還如去歲秋美人消息遠令我心悠悠吳
水東流去秦山不可求想君談道處念此日幽囚

二

礙彼清霄月停空有片雲懸吾方寸地文武趙將軍咫尺燕山側常如萬里分艱危知善處君子自相羣

五言律詩

雜興

鴈羽衝雲去燕山春意濃孤踪一路險衰鬢兩邊蓬戢步緣新綠依隈挹暖風將吾眼底事都付不言中

二

地隱春遲到幽懷更耐看鴈聲愁遠塞雲影滯餘寒斗
笠營秦隴絲綸坐渭竿而今耕釣手桔槔亦相安

三

我心誠匪鑒遺恨在雲壤豈但身憂切更餘國慮長九
重終自悟一飯亦難忘只恐建炎詔徒憐陳少陽

四

身危非所恤多罪累君王萬古綱常理一軀忠義腸青
天掩長霧白日下繁霜兒女此時淚未知為國傷

即事

百年吾宇宙萬里此相逢
阨險情猶適經綸志復同
隙風動颭颭窓月照彤彤
對榻閒談後悠然世慮空

二

裛危親杖屨步履轉徬徨
地作臨池濕天從入夜涼
清颭輕燕室雲影暗幽堂
孤念蕭蕭在閒同歲月長

三

結髮交遊好同舟涉渭濱
壯懷今若此老淚更堪瞋
險

地忙為苦長天去是真知從大夢裏自了百年身

獄中慰章秀才

萬事總由命宜須安受之但求一念是莫嘆百憂懼窘
迫宜自處將來做廣居樂天境界上得到是男兒

有報周磧山先生家慮於獄中者痛而作此

一朝君即死七載我猶生祇墮萬人淚空留百世名乾
坤藏正氣日月照精誠展轉思餘喘真如草芥輕

勉仕男讀書

長路頻來往空將歲月虛百為超俗慮一步到天初只
使心無蠹何須食有魚燕山二尺屋可讀五車書

二

憂國吾遭難思親汝復來青天何易蔽赤霧總難開萬
里豺狼路千尋枳棘臺要知百死地不是一身災

有感八首

燕語遺牕外薰風入臥邊真懷死難易歲序幾經遷國
步終成蹟雙毛半已顛獨憐憂世念空自九重懸

二

期親堂上老遊子淚潜然假寐驚還起餘生死復延脚
跟總實地屋隙是晴天骨肉心難遏朝朝百慮牽

三

老去心猶壯詩成一洒然襟懷羞縷縷風景嘆年年
竚立凶危地出王日夜天死亡誠旦暮終不受人憐

四

憶昔躬耕日蓬廬夢九州握珠雖易出按劍總難投草

芥生猶在君王尚遠謀古來殺諫士誰可免多憂

五

好景隨時在幽人心自如難將當世事得免動相於總是更新念還能展舊書古人心已逝誰共嘆離居

六

殘雨急聲住牕風更覺新獨憐幽景暮空抱此心真跼步萬方足經年百死身每憂深罪裏無以答蒼旻

七

庭院幽沉處黃鸝聲自和炎風侵夏木世道轉頽波夙
志逢時健韶光雙鬢皤如何人世上獨我憂心多

八

有時樂興至觸目更憂來時覺寸心鬱未能盡日開人
謀尚消息天意自安排將此百年志空餘萬慮灰

聞黃鳥

庭柯鳴歲月又是一番新憂世總宜獄感時却憶秦早
梅乘暮雨佳木秀溪濱茅屋遠塵跡空遺老此身

送忽百行

忽生遙以慰五日歸期倚劍無歧路佇雲有舊思自
吾蒙困難於子始真知人世關情處難為此別離

遣仕男歸家

骨肉分離久殷憂切寸忱兒無膝下苦父有坎中深顧
此五年困皆吾三代心一升與一降物運此相尋

謝信官

患難人多畏信郎獨不疑再從牌上寫曩在手中提每

日多君厚經年濟我飢老夫窮困裏報汝一聯詩

懷友

園中春早到含淚送心知何處相思切歸來獨坐時詩
書還有分患難總無期俯仰千年事哲人若在茲

二

相逢在縲紲歲序兩推移論難思洪古胸懷各洞披朝
朝同暮暮切切與偲偲音容今萬里西望日嗟咨

三

憂時同講道發興共聯詩而我相逢久真為人世奇窮
通忘苦樂聚散有歡悲無奈此心切長歌衍浩思

送尹商衡都黃門出獄

公諱為相

數月同幽難一朝慨別離送行無喜色居險有憂思好
結詩書伴不為貧賤移山林吾素志應筮丈夫需

商衡獄中

筮得損之需

二

需極乘時起文明及早開經猷小自預功業大期來氣

運機方動人謀預可回兩肩剛骨上

缺

三才

哭翟尚書

公諱鸞
號聯峯

昨夕云長別今晨餘一丘身亡及此地國步為分憂一
品恩猶在百年事已休園階遙拜下雙淚不能收

二

人世誰無死哭君吾倍傷大臣屬手足司馬近簾堂宣
意履危險錯思銘太常屍留獄戶外殘藁蔽斜陽

送人出獄

昨暮動相問今朝奈子何別懷增慷慨回首欲滂沱一
隙蒼天在百年憂境多共憐宇宙內世道類江河

書聯翁病中屬言後

最可傷心處身危及犴圜青天臨潞水白日照燕山各
有險夷路誰無生死關老翁書片紙流淚不能看

雜咏

悠悠蒙大難歲月總無涯憂世多君慮好音向我懷浩
然揮翰思儼若定心齋三接咸亨泰欣瞻白玉階

又

鷗鵬離楚水舒翼到燕臺世道同文運金吾久已開寵
從天上降人是謫仙才還喜新榮後恩光次第來

謝人餽桃

念此幽囚久相逢獨見真論心許忠孝於義多君臣良
士輕聲譽招人重保身投桃知子厚報李愧子貧

贈姜義泉義泉未病時自謂將緣事出獄索詩以
贈之過數日病二十日即死命也

十年交與後此地復相逢安土心猶在匡時志已窮君
當耕蜀下吾欲死園中樂道捐軀處無言跡未同

哭西村楊御史

夫子今長逝感懷可若何蒼天奪善類人世亦浮波九
陌青驄頌千山輻樞過友朋知痛汝幽地淚偏多

五言排律

冬月都憲李石疊來訪見子弟輩衣服單寒近午
未飯感嘆不已作此解之

吾家生計窄歲歲慣飢寒薄午烟方舉隆冬布不完三
旬九遇食十載一加冠堅讀吾由命長貧汝自安但看
顏氏子陋巷樂瓢簞

五言絕句

懷緒山

無限停雲思悠悠興欲飛仰看向南鵲遶樹竟何依

二

不見緒山子年光忽四週隨風秋夜夢直到越江頭

三

宇宙相同意越江萬里深東方欲曙色畫角動悲音

四

江邊尋至樂回首覺憂思宇宙皆吾事心寧不在茲

五

殘屋食不足扁舟樂有餘北風如解意寄我常相思

病起

病起餘新興殘磚藉簡編不知從此後再得幾殘年

二

一片韓山石千年臥荒草峻嶒何所前落日牛羊道

三

南風乘隙入吹破幽人悶簷外鳥聲和一般成四韻

有感

乍雨噴聲歇閒雲落影空滿懷今日意都付與東風

與男詩

知子讀親詩難禁雙淚垂君臣與父子忠孝兩得之

有報周蹟山卒獄中痛而作此

天上列星墜人間草木愁滿腔都是淚只向暗中流

過軒轅廟

初古混沌裏開天有至人衣裳成世道兵力蕩妖淫龍
去羣臣泣功臨下土尊唐虞享大化聖聖與神神

過淮陰祠

落日蒼山道淮陰祠下過禍生齊境土功在漢山河野
鳥啼新樹殘烟帶薜蘿英雄千古淚汾水一添波

過栢井

栢井蒼崖到懸懸引旆長殘烟身未斷亂石巧相當松
秀春鳥叫山空野草芳井涇今又近先慮馬蹄傷

竹花同池

竹花同池生何人知有情花繁滿高枝灼灼驚人目竹
若虬龍形蒼顏微帶茱花常頭上紅竹常地下仆顯晦
各有時愛憎若不足感發送寒霜青青惟有竹

送麻太守出獄

喜君歸田里況是獄中心田里有真樂君宜仔細尋
喜君歸田里況是獄中情田里有真樂非君莫以明
喜君歸田里況是獄中人安得同君去超然遠世塵

秋雨歌送王生行

往時逢君雪霏霏而今再逢雨瀰瀰天涯歲月驚迅速
倏忽春雪轉秋雨秀彼幽隅苞桑枝我獨樂此之無知
王生幸來同解意轉看又是相別期秋雨秋聲寒將至
郊原百卉色凋悴祇見繁花畏風霜惟有長松挺挺翠

憶昔豪士此心多感慨將來為子歌告別各懷情緒
相逢但記雨滂沱吁嗟王生也吾今奈子欲去何

寬心歌

此間莫怪會寬心好向先民樂處尋尋得一分消百慮
男兒何處不寬心此間莫怪會寬心靜眼能觀古與
今成雨成雲他自有男兒何處不寬心此間莫怪會
寬心善到居安根自深一點天真含萬物男兒何處不
寬心此間莫怪會寬心叅透一陽與一陰要了無窮

人世事男兒何處不寬心

高歌

問予何事日高歌只恐胸中他慮多聞事愁人人易老
得高歌處且高歌 問予何事日高歌眼底紛紛將奈
何一曲不知天地大得高歌處且高歌 問予何事日
高歌困裏光陰恐易過宇宙和平方寸地得高歌處且
高歌 問予何事日高歌聲響悠然即太和心到忘機
是真樂得高歌處且高歌

謁孔明廟

遠結茅廬野水濱
幾翻風雨秀荆榛
敝門晝掩高千古
愧我青巾多路塵

疎林野鳥數聲鳴
想見當年泌水情
世主肯勤三聘禮
先生有意在蒼生

送李金陽驛丞

故人別後已三年
萬里音書一念牽
安得生還吾與汝
美原同醉杏花天

聞鴉鳴

往古來今善可行人生世上事分明吉凶由命皆前定
任汝嘵嘵徹夜鳴

過淮陰祠

遙憶當年拒蒯生將軍心事自分明可憐宇宙無窮恨
盡在中宵悲樹聲

又

酈生終把蒯生

缺

君臣況可憂分土雖知羞絳灌

抽身何不效留侯
荒祠空洒英雄淚
青簡還多信史收
百戰功勞千古恨
淒風落葉暮山秋

楊忠介集卷八

欽定四庫全書

楊忠介集卷九

明 楊爵 撰

七言古風

題雲津書屋

江南書屋號雲津，千卷萬卷皆非新。
讀書誰解書中意，我識劉氏家傳真。
積德先世有賢哲，認得孔顏不是貧。
開基不肯買附郭，惟以典籍貽後人。
精一肇自唐虞初，

此是古人心上書後來讀者失其要一生辛勤類蠹魚
人心原是書之本會尋真趣便能虛心書與道相忘處
身居天下之廣居吾聞陋巷顏氏子耕莘伊老翁學發
孔聖蘊德與昊天同道業千年昭宇宙孰非昔人讀書
功繼述遠將源流挹獨立今見水部公匡時不恤觸危
機振拔真有古人風正氣雖由衡嶽降修為要自雲津
中秦中鄙人願學步蔓草安得比長松嗟我東南有心
事耿耿日夜望蒼穹國恩詔許釋狂罪扁舟同過呂梁

洪隨君得拜漢高帝豁然開我此心蒙

吊許忠節公

泰華巍峩高且秀難擬許公忠節橫宇宙河海汪洋浩
且深難擬許公忠節在人心任人濺我一腔血惟留忠
志照日月身可斷為兩截氣渾完其烈烈吁嗟乎許公
同天地而始終

惻惻行送王大尹出獄

惻惻送君幽繫裏天涯回首如千里此歸何以佑斯民

直須德化平如水最憐愚昧與饑寒古今失所皆由此
受托宜思君父恩同類孰非吾赤子君不見蒲鞭一段
好生心天地萬物真同體

古栢行送王子言

雨秀金吾古栢叢老枝猶解起南風乾坤留眼吾看栢
看時聊與子言同看栢豈惟憂自崇看栢還增恨無窮
獨不見去冬飛雪滿長空宇內應無桃李紅偶從挺挺
寒栢下與爾送出平定公

平定公子
言同鄉

憶昔行贈李石疊

憶昔相別蘭若裏而今咫尺如千里嘆我老作放逐臣
喜君又為蒼生起我思古人獲我心憂國憂民結念深
未說江湖與廊廟惻惻盡是此胸襟何以示之有周道
知君不愧此懷抱化理從教險地敷調元應得絲綸早
昔聞闕輔試蕭翁今見中州借寇老拜手天庭出帝畿
燕街草色映旌旂想像郊堤多楊柳為君無由折此枝
到處爭迎舊憲使春雨秋霜遍遠邇吁嗟吾民正倒懸

願君此去愛如子

山西行

吾聞往歲旱魃災赫赫炎暑毒埏垓壠上禾苗盡枯槁
茫茫千里赤塵埃疾威均為下土虐山西之民尤可哀
閭里餓莩無所告昊天又降酷烈來草茂秋高敵勢張
戎馬南侵混疆場可憐百萬生靈命盡在邊人刀下亡
太原城外數千里血流漂杵遍封疆死者縱橫如山積
守臣不敢奏朝堂殺氣騰空鬼神愁尸填溝壑水不流

舊時邑落數千室而今且無二三留敵情變譎不可測
邊將何不蚤為籌廟謀要得良平策經畧須用韓范儔
朔方世為中國患古來誰不事先憂君不見薄伐玁狁
勵士馬周王允是中興者當時文武有尹公舉旂一麾
清郊野又不見漢帝當年重細柳亞夫軍前無躑躅拊
髀思賢一飯切魏尚復作雲中守天生我皇聖且仁區
區周漢豈作論常慮一物或失所豈知邊釁瀆蒼旻我
願君王目視遠燭沕穆望見山西境上多白骨我願君

王耳聰聽幾萬里時聞山西哭聲夜不止

鬻子行

燕街寡婦淚漣漣自言夫死未期年畫勤織紡為衣食
夜撫孤兒不遑眠孤兒幸能學步履我夫有以繼其先
成立時遇清明節今將麥飯洒埏前妾身百年歸于室
地下逢夫無媿顏奈何我生日惻惻靡依靡怙嘆伶仃
旻天不吊此窮苦疾威頻將下土傾往年麥豆皆枯槁
晚禾遭霜又未成今春父子不相顧骨肉分離向遠行

眼見舊時多富姿而今轉作溝中泥母子困阨何所賴
泣抱孤兒走京師誰知京師亦蕭條哀哉艱難無處號
街頭死者無人掩多是流民向此逃母寒兒饑日叫哭
無力走去但匍匐眼中流淚口中乾只得將兒入市鬻
市上紛紛草標待賣者空多買者稀直到日夕纔定約
破錢百文救我饑思量此錢買黍飯是食吾兒膚與肌
拭淚收錢敝裳濕如割心肺痛難支母解懷抱將兒出
兒將兩手抱母衣跌脚投地氣欲絕竟將母子強分離

買主抱兒色悽慘婦人欲去步難移兒哭聲母哭聲皆
哭死者又哭生兒哭母毒舍我去母哭蒼天叫不應

鬻妻行

何處調饑貧少年將妻鬻到街前但道誰人肯買去
免我身向溝中填婦人雙淚向夫揮勸君莫作苦辛為
自從結髮成夫婦共期偕老日相宜此日遇不淑豈肯
遽別離願割妾身肉充子一朝饑同我良人死溝壑不
忍又縫他人衣

送董允恭出獄

我送允恭出獄牆徘徊別意各悽愴來逢易水波浪險
去見燕山艸木黃子之故人周給舍同於幽難久備嘗
迪已不肯甘流俗論治必欲尚先王明招保身雖未得
懷此赤心良可傷子實聰明心好古聞其論說輒徬徨
我抱困病足如跛睠念時來類臥傍黯然別去消息杳
窘迫相與永難忘三尺禁網脫身去一片襜褕到長江
有手但執瓦缶物有足莫走聲利場世間芬麗一染着

能令耳目充無光丁寧告爾復丁寧此真全身全性之
周行吁嗟允恭既去矣送子行行復行行回看世故總
茫茫留予露冷風涼夜漸長

園士送別次巽峯韻

秦山越水各東西多難相逢慰我思握手不堪忽別去
還將夙願與君期我思故人不可見顛沛終能慎所之
翻覆眼底都忘却曠然一笑破愁眉幾微常向靜中察
立身難最解真願多歧荆棘妨步履始知世路有險夷

百死一生淹歲序焚香日夜對包犧得君開我心迷謬
感悅還惜邂逅遲困阨既非人自取各安天命復何疑
他年如得走閩海釣臺高處揖岐嶷

酸酒歌

君家有酒酒頗酸壺罍不輕設簞莞昨日偶侍几席側
一罇將來啟大觀世人往往喜黃流豈知酸味是仙丹
平生歲月酩酊裏況此狂狂風雪寒要向酸中通大道
茹飲畧不以為難自笑狂惑乖至理滿室流作赤血灘

幸此餘生尚未滅肯把宿昔酸興闌安得滌腸酌大斗
免我觸眼日常嘆人飲未能成涓滴我飲必須瓦缶乾
人飲不覺眉頭皺我飲胸中天地寬世上酸苦任他入
方能擴盡此心端酒中酸味真能解勝將周易日空看
君不見滄海茫茫總無涯納盡人間萬頃湍

微飲行

一日未到官屋中恰如十年不相逢周行未見言提耳
索居孰啟我心朦問君何所事古訓日研窮室內香靄

靄窓外月腫腫更深人靜後朗誦徹蒼穹尚書萬古獄
中授周誥殷盤已貫通韋編不知今幾絕遠慕義文周
孔風媿我全無亨通意衰年未見養心功常將一段鬱
抑氣噓作雲間千丈虹憂時慨世心獨切半偏深病未
消融而今願從君子謀示我脫然登岸頭藉此福堂尋
上去莫教空負兩年囚嘆靡靡思悠悠君知否我何求
相與采蟲無處所安得泮渙日遨遊思量此疾為心患
世間惟有酒能瘳昨聞几上罇猶在半實還是舊黃流

午間准擬來相訪便須勞君酌大甌但論濁賢清與聖
何恤瓶罄作壘羞長歎直到枯腸底一洗胸中萬古愁

再進酒歌

再進酒再進酒幸我磁樽酒還有昨日一醉憶蓬萊而
今要與謫仙偶宿醒猶在枯腸停更下一甌烟光吼坐
忘天邊歲月長但覺胸中龍蛇走酒遞園牆恨少來涓
滴此間敵數斗人生百年能幾何莫將頭上巾空負再
進酒再進酒聽將心事為君剖洪鈞賦此男兒身誰能

甘與草木朽三斗竹葉始朝天一車麴蘖涎出口古來
飲者多聖賢吾舍斯人與誰友莫怪沉酣在憂慮盛時
不樂將皓首君不見長索難繫落日飛童顏倏忽成老
叟宇宙浩蕩總無涯世上紛紛何足數痛飲本為破愁
懷屈指反成中心恟錢君要做義皇人趙君能文且赳
赳黼黻折衝間世材此日誰惜縲紲久再進酒再進酒
孟軻脫身輕萬鍾孔聖亦類喪家狗無窮世事休間思
但慮酒乾誰復取醉倒玉山隨地眠何必說桎梏在足

更在手

書白樓詩卷

趙總兵
號也

將軍之居近白樓將軍之才冠帝州胸中自有兵百萬
曾出將府舒國憂而今久作園中客可憐魏尚同幽囚
一到圉圉八九月手執周易誦不輟將軍本是儒者流
於此可以觀志節雲鳥往時成八陣韋編此地慕三絕
每向憂中尋樂處魯史周文日講說談文論武擬虛舟
我識將軍豪興優身雖凝坐一室間心在義皇境上遊

嗟子真機久未開
狂惑速禍自天來
還幸此日成良晤
彷彿樂趣散愁懷
世上紛紛苦幽滯
困亨誰解昔人意
幾時各得歸山林
毋忘爾我自相遇

七歌

有手有手手段拙
弄得人世紛如雪
未宜醒執名利板
但可醉撈秋江月
忽忽百年成甚事
微微一息久將絕
嗚呼一歌兮為爾
憐要撥雲霧轉晴天

有脚有脚脚步錯
錯走當年塵世道
崎嶇多是倒人坑

一覺反為魑魅笑未死還餘憂世夢有生堪類霜前草
嗚呼再歌兮歌正壯蹈入冥海千層浪

有耳從來豈不聰人說宜西我却東萬方愁苦聲堪痛
收入無底雙竅中迅雷不顧額前震身禍飄如輪後風
嗚呼三歌兮歌愈悲傾聽莫為利口移

有目閒將一世愁聚來都放在眉頭肉眶不見羊腸險
血淚可增江海流我思括人瞻萬里乾坤顧眄在雙眸
嗚呼四歌兮歌意頻要識人間假與真

有身形弗七尺長地維天柱要擔當幾年餓成空皮骨
扶杖出門欲仆僵外混塵埃羅羅網內抱赤心與忠腸
嗚呼五歌兮歌迫切酒盡天涯一腔血

有子有姪未成立音書問我我惻戚跋涉往來六七年
千山萬山日灑泣讀書耕稼總難為思量到此喘噓吸
嗚呼六歌兮歌未闌父死誰憐汝饑寒

有甥生年為我勞往時見我便長號汝母今年將半百
骨肉屬我父母毛兄弟往來無了日令我憂中思爾曹

嗚呼七歌兮心未已收我殘骸歸故里

楊忠介集卷九

欽定四庫全書

楊忠介集卷十

明 楊爵 撰

七言律詩一

遣懷

韋編自伴倚幽窓
世故年來頗會忘
百代人豪空宇宙
半丘荒艸照斜陽
孤懷耿耿幾長夜
蓬鬢蕭蕭一老狂
曳杖庭階徒想像
路迷無處問滄浪

招友人王泉崗同學尹家村寺

門外同人且向東從來錫類古人功每于蘭院瞻牛斗
且伴芸編馴象龍花露影清前日異世情不染此時同
勸君莫負離羣隱好把瑤琨就石攻

次羅整庵先生韻

嘉遯胸懷自浩然高風宇宙久相傳難兄難弟心同好
時止時行道未偏明主歲勤優老意蒼生日望濟時權
正看霖雨蘓天下無奈丘園一念堅

題碧泉用杜工部韻

樂饑襟度憶當年獨玩松溪此滴然共羨真源同石髓
誰憐清味遠瓊筵懸崖不憚千尋險放海還憑一脈綿
莫道泠泠無與伴主人日坐碧泉邊

登華山詩

夢想茲山二十年今朝散步上其巔奇峯塵外峻嶒立
怪石雲間顛倒懸雨過一聲促織響樹深幾笠牧童眠
大觀到此方為得覺我心天高萬千

元日次晴川韻

已遠昔年鵷鷺班遙從犴狴仰天顏形踪眇眇寰幃下
世故忡忡方寸間患難久憑君德厚赤誠只自我心閒
平生不洒身家淚兩眼今為天下潛

謝友人王泉崗贈衣

平生交結未輕羣二十年前我與君膠漆弧蓬諧菽水
風霜蘭若論斯文解衣情思如何限折簡憂心徒此殷
明月山中多勝迹同誰尊酒伴閒雲

蚤春

晴景初開淑氣端
共看臘色已殘漫
天邊轉眼流光易
困裏驚心世路難
自嘆百年懷抱切
還思一日聖恩寬
園中蚤覺春先到
似恤羣臣五夜寒

共把愁眉且放開
喜看春臘再相推
城邊煦景新堤柳
墻外香風帶野梅
世運從今轉熙皞
聖恩不久自天來
故園咫尺佳山在
一日定遊三百回

送友人

賓薦同登二十年便思宇宙在剛肩有名從仕版朱行列
心向閭閻赤子懸雄展應知今世少清貧不讓古人先
功成准備隨琴鶴廊廟方收天下賢

述懷

禁裏東風覺漸和背陰殘雪果無多眼前楚楚蜉蝣羽
心上悠悠擊壤歌道義無窮須共勉時光有限莫蹉跎
遙將佳趣問良友鴈過長空興若何

春興八首次韻

纔見春光轉上林
錦臺微冷尚蕭森
風回薊野有時息
霧隱燕山盡日陰
燕語鶯啼園內景
江湖廊廟老來心
更深還有愁人處
門內柝聲門外砧

疎窓照日影初斜
可奈囚居此歲華
傳世從來無赤子
通天空憶有浮槎
依依遙見城邊柳
裊裊忽聞塞上笳
詩句漫成還有用
將來幽地賞春花

共坐園門向日暉
開襟更覺暖風微
葵生已露根頭品
鴻漸還成天際飛
將此孤懷頻點檢
肯教素步自相違

紛紛無奈爭春物綠幹紅芳一樣肥

三載艱危嘆白頭
可堪吾志在春秋
自憐賈誼一腔淚
空作張衡四段愁
適意時看堦下草
奮飛終愧水邊鷗
美人踪跡今何在
杖杜猶存古雍州

認得西銘如下棋
茫茫宇內盡堪悲
顧予顛沛真無似
空惜盈虛自有時
燕羽輕風還翻翻
春暉驚眼又遲遲
艱難惆悵懷千古
采采榛苓是所思

十年佳趣在青山
瀟洒襟懷出世間
心上一真原未泯

眼前萬類總相關
緬懷周道今何事
寤寐哲人多厚顏
歸去再尋千古上
耕莘老叟與同班

斯文千古是誰功
由彼陶唐立大中
措履敢從浮世好
幾微深愧古人風
衢連柳過園牆綠
苑隔桃侵屋宇紅
潦倒還思涇渭上
絲綸閒釣有漁翁

山連薊北見逶迤
小徑通天傍險陂
隱谷長蔓多細艸
懸崖短幹少松枝
習浮鷗子隨波逝
憩樹牧兒逐影移
老去登臨無健力
白頭空惜此低垂

贈泰和劉洗心秀才洗心兄晴川翁同予繫獄洗
心自泰和奔來問賦此以慰之

諫草傳來自可驚倉皇策馬上燕京一腔忠藎君臣義
萬里風霜兄弟情日邁已能扶世道月征真不愧天明
江南韡韡看棠棣春雨春花已滿庭

學問須先會洗心洗心於道最能深仁義英華成事業
廟堂根脚自山林祖先原委家傳遠兄弟芳名世所欽
得志知君存素履宣同流輩但纓簪

贈人

困裏逢君一月春，同方不覺自相親。
文章早已添聲價，德義猶思與日新。
有意動時成性僻，未安心處是真真。
必須俯仰先知愧，然後能為無愧人。

雜咏五首

閒步幽堦伴夕陽，塵埃眺望總無疆。
風吹古栢棲鴉亂，雪掩寒山狡兔藏。
半世生涯真類夢，幾年毛髮已成霜。
憑誰再取新春酒，日放長歌任老狂。

獨倚園扉對日斜
緬懷松竹已成賒
迷途豈但千程遠
脚步空留百代嗟
時繫鐵鐐甘罪戾
漫吟風景是生涯
殘磚閣火燒沙釜也
類山村野店家

有脚陽春到處通
金吾氣色轉寒松
壯心迥出存亡外
殘魄逍遙化理中
寂感胸懷驚歲月
孤危踪跡倚蒼穹
羊裘一片隨朝暮
興與雲山野老同

濡險悠悠歲月頻
強延一息又逢春
天空斜日鴈留影
地迴煦風草弄新
內聖外王同貫合
身謀國計總相因

憂懷轉作元亨處此是人心一念真

天降窮阨浩無垠金吾桎鎖伴儒臣久遭危患心猶泰
運轉亨機思欲頻要信樂天為樂土須知憂世是憂身
有詩吟咏忘顛沛彷彿羲皇境上人

與晴川飲用杜工部韻

十年遊樂有山溪堪笑功名一旦迷身世三春留犴狴
夢魂五夜到秦西養心幸得逢良友披卷還須作筌蹄
牆上半罇清酒在與君同要醉如泥

幽園無處訪清溪幸有高人啟我迷共坐斂襟還共起
堪東隨步又堪西百年心事羞輪蓋一日西風陷馬蹄
寄語西臺同志友老狂依舊醉如泥

遷榻次韻

十載潛身一草茅興來誰意向芳郊六經愚腐散塵几
三徑荒涼卧竹稍垣寂秋深風落果梁閒春到燕銜巢
衰年至此真無似儘把疎狂任世嘲

贈友人

種德羨君能有終
皇天日錫慶無窮
膝前稚子丰神秀
堂上雙親福壽隆
誰共聲通千古上
更留惻切萬方中
幾回遇別此何地
惆悵乾坤眼底空

見童子頭挿苦菜花索觀之作二律

穠英彷彿類秋菊
先飽無涯春露滋
隱隱一般神色好
煌煌幾點化工奇
開來可伴囚中眼
採去能療天下飢
聞說牡丹多艷麗
讓他生長洛陽池

真顏淡淡而濃坐
見百花色自空
惟有仰天傾白日

也堪隨地伴東風肯因薊野門前黑不向燕山雨後紅
但慮聖朝寬我去無人解爾此奇容

病起述懷用杜工部韻

春日悠悠病已痊獄中再得數殘年天光遠照來檐隙
良友頻憐到卧邊無似懶將閒帙展有時還是抱愁眠
感懷骨肉應分念百口懸懸心在燕

次緒山韻五首

閒棹一旦會消融驟雨驚風過太空隱顯從心無上下

險夷信步有西東感來定擬初張弩應罷還如未叩鐘
浩浩霄壤多少事真機都在卷舒中

雙鶴飛來園樹梢看他春到便銜巢顯庭常若儼賓際
幽世必須藉白茅心果合天真浩浩狂非作聖但嚶嚶
會教身世全無我方寸纔能免物交

莫道幽居心可欺格思便有鬼神知還看處處玉吾地
敢不時時慎所為要走長途須健步能除深病是真醫
誰言岸遠難先到只在人心一轉移

眼底紛紛變態多誰憐世道日頽波百年事業真難措
半隙光陰亦易過川上月臨懸細餌牆頭雨倒整煙蓑樂
遊却恐歸豪放渣滓須先向此磨

此心常要擬虛舟虛得能將萬物收後樂不妨隨地樂
先憂豈但為身憂也知步履須藏用却笑疎狂真妄投
齟齬方圓成感慨徒懷擊楫在中流

和太白山人韻三首

時來門外坐春曛世事紛游滿眼頻進退憂思今最切

江湖廊廟更何人循環泰運期三代展轉凶危此一身
却憶子牙清渭上釣竿投處有芳隣

晴暉薄午暖風細此地獨憐春更幽五夜露花新柳色
一番鴻鴈動江洲百年事業懸心切萬里瘡痍滿眼愁
堪笑襟懷潦倒際時看鳶鳥半空遊

夜柝忽驚鄉夢淺破雲殘月照窓斜寸衷不是杞人過
四海原為天子家雙鬢蓬搔老囹圄一身寂寞又春華
憂心獨覺孔殷處世故茫茫未有涯

聞次女亡

傳吾子秋去年亡凶訃一聞五內傷姊妹云何相繼死
父親血淚洒園牆往時女訓勤莊誦今日哭聲滿屋堂
雖我自言不過慟也應默默斷衷腸

初夏二首次韻

不教閒慮在胸中便與長天一樣空信步踏來皆樂地
開襟滿抱是薰風庭前栢色拂雲綠牆角葵心向日紅
更有一般好景象應時黃鳥轉幽叢

日上園牆景寂然老囚於此尚安眠好懷還有四時興
世故全無一念牽糯米煮從沙釜裏詩書堆在枕衾邊
何翁若解吾真樂日食何須破萬錢

送李明甫

去年車檻過蘆溝見爾卜居蘆岸頭山秀堪宜連屋峙
水清恰好繞門流四時家有瓶中粟一卷心無意外憂
公事了尋遊憩處幾叢喬木淡雲浮

端午節

園中佳節喜相尋況有良朋與合簪蒲酒且同今日樂
負盤因見古人心憂時未恤身危久宥罪還思恩詔臨
此日密雲成驟雨似傷屈子淚淋淋

遣懷二首用杜工部韻

數片殘磚閣睡牀顛危知是舊周行時嚴舜跖兩條路
日誦義文一炷香心健自能忘困迹榻閒猶可擁衾裳
襟懷還有瀟然處每向南風歌興長

夢想丘園孰與班秦中涇汭傍商顏百年須係閒中罷

一曲長歌日暮還
月朗風清皆自得
鳶飛魚躍在其間
茅齋却笑堪人意
正對南山倚北山

閒作四首

斯道瀰漫貫古今
幽牕正好整囚襟
毫釐乖謬天機遠
一念虛明上帝臨
禮用事時為復禮
心懲失處見真心
存亡操舍皆由我
默默須從方寸尋

叅破乾坤古與今
一憂一樂見胸襟
鬼神不爽幾微監
幽室常如師保臨
君子固窮吾未得
哲人自靜彼何心

包義不盡當年意此地還須細細尋

思古原來為挽今國民惻惻此曾襟致身臣子曰忠蓋
為答天王之智臨霜剝風摧今日事江湖廊廟往年心
天乎命也難窮極一息還從真處尋

自古遭逢未有今空茫宇宙見胸襟孤鳥走走聲聲叫
雲雨朝朝暮暮臨輸已應知郭泰慮濟時還識范滂心
感來感去真機在此理纔知不易尋

劉子壽日

初度園中今四度白頭萬里香江鄉瞻思夙夜九天遠
感惻徬徨一念長我輩元來多妄動聖朝未肯殺忠良
壽隆本自君王造但把赤心儼對揚

夜將曉夢過原次寮隱居賦詩為次寮贈得起二
語覺而足之乙巳年六月初十日

莫道山林無可樂隻鷄斗酒有餘情覺來却是園窓夢
卧聽燕山杜宇鳴幽壘縛我家何在此事令人身自輕
一枕黃梁心未了長天目斷片雲橫

和大司馬聯峯先生詩二首用其起句

席地簷前趁晚涼幽懷相與嘆流光思危自覺一心折
行遠空餘雙鬢蒼風景久成人慣習卷舒堪笑此顛狂
世間翻覆都休道只可堅吾百鍊剛

席地簷前趁晚涼逍遙不是傲羲皇蹇修天亦憐吾拙
拯溺人堪為世忙興着野花呈艷好情關幽鳥弄笙簧
生涯老去無長物一卷韋編袖裏藏

送紀中夫歸秦

與子同心二十年僧堂香火半爐烟正防步履三關險
却笑功名一線牽囚繫艱危懷後進衰殘寤寐仰前賢
歸來共了平生事就此先期立志堅

送林張二都黃門謫官出獄

侍臣暫出五雲鄉總是皇朝恩浩滂九品官非閒處着
千鈞弩在甲中藏幾年忠疏流封內萬里懸旌歸帝傍
他日賜環承顧問好將民瘼答君王

獄中贈孫都御史

一繫秋梧歲序遷眼前光景總堪憐暮雲思望八千里
濟世勲名二十年天降困窮終有益到今顯祖始無偏
從茲努力加餐飯浩浩乾坤在兩肩

乙巳年八月十二日主上符鸞釋放尋復逮繫有
感

忽憶去年今日秋狴狴同得荷天休暫歸故里觀三徑
傳播綸音到九州明主心無偏好惡小臣罪未了幽囚
有時曠蕩恩還下稽首遙辭五鳳樓

詔獄言別

逢君傾倒此衷誠追憶平生契合情心為綱常千古重
言因忠鯁一身輕同來被逮春光煖此去垂綸淡水清
千里神交勞夢寐蒲臺曉月見高明

許由巢父二人皆唐堯時高士也與後世身陷縲
紲者相去不啻萬世傳稱棄瓢飲犢事皆未知
有無昨夜夢入其廟中見二人像欣然有感題
詩壁上未就而覺乃足成之甲辰九月二十二

日書于獄中

遭逢世道是昇平高尚同將天下輕樹上瓢捐風響定
耳邊污去水流清山中不換冕旒色犢口惟餐芝草英
恍惚蕭然祠宇在塵顏羞見二先生

哭李石疊

傳來凶訃自中州此地哭君欲白頭風雨幾番入夢寐
功名半世屬荒丘五年離別心猶在一代英豪事已休
空墮兩行憂國淚柩前一洒意無由

秋燕

寫寫深高罪未終思量安得此萍踪殘生久在天邊繫
世故都從眼底空漸覺秋風千路澀還看霜月萬山紅
願將國步與民瘼入我皇王所照中

重九用杜少陵韻

處處重陽今日節年年身傍金吾臺風吹短髮囚巾冷
酒破憂時懷抱開世上感多誰應少眼前暑去又寒來
丈夫一念真機在豈效牛山悲老催


除夕

遙想去年此日新臘殘復見舊光陰慨時祇向人偏切
抱痛誰知我獨深一片春暉成慘景數聲鳴鳥是悲音
眼前踪跡今猶在淚洒衾裳不自禁

幽累屈指兩年餘還遇更新除舊時寒去今宵猶有滯
春來明旦總無私江湖廊廟人人樂栢酒椒盤處處宜
忽憶山林同守歲村醅一二老相知

送人

共處憂虞冬復冬而今君去我誰宗風寒谷岸松猶翠
日淡城頭雪未溶杳杳鄉關幾萬里茫茫天地一孤蹤
安能將此別離淚一洒淋漓到九重



楊忠介集卷十